

Kalaallit Nunaanni sulinermi avatangiisit pillugit inatsimmik nalunaarut

Beskæftigelsesministeriap inatsisaanut nalunaarut nr. 1048, 26. Oktober 2005-meersoq kingusinnerusukkut allannguiffigineqartoq – akuerisaasumik ataatsimut allaqqitaanngitsoq

Ataatsimut allanneqarneranut ilaapput

- 1) Inatsimmut nalunaarut nr. 1048, 26. Oktober 2005
- 2) Inatsit nr. 1382, 23. December 2012-meersoq

Matumuuna nalunaarutigineqarpoq sulinermi avatangiisit pillugit inatsit, tak. inatsit nr. 295, 4. juni 1986-meersoq, allannguutit inatsimmi nr. 193, 26. marts 1991-meersumi aamma inatsimi nr. 321, 18. maj I 2005-meersumi § 3-p nassatarisai ilanngullugit.

Kapitali 1

Siunertarisat atuuffilu

§ 1. Inatsisikkut tunngavissinniarnearput

- 1) isumannaatsunik peqqinnartunillu sulinermi avatangiiseqarnissaq, qanoq ilisukkulluunniit inuiaqatigiinni kalaallini teknikikkut inuttullu atugarisatigut ineriartortitsinermut naapertuuttumik, aamma
- 2) sulliviit namminneerlutik suliffeqartitsinermi kattuffinniit ilitserorneqarnikkut aamma Sullivinnik Nakkutilliisoqarfim-miit ilitserorneqarlutillu nakkutigineqarnikkut isumannaatsuunissamut peqqinnissamullu tunngasutigut aaqqiiviginissinnaanissamut tunngavissaqarnissaat.

§ 2. Inatsimmi pineqarpoq Kalaallit Nunaanni sulisitsisumi sulineq.

Imm. 2. Pineqanngillat

- 1) sulisitsisup namminerisatut angerlarsimaffiani sulineq, taamaattoq tak. § 45 d,
 - 2) sulineq, sulisitsisup ilaqutaanit, illumi inoqutigiinnut ilaasunit taamaallaat ingerlanneqartoq, taamaattoq tak. § 45 d,
 - 3) sulineq, sakkutuunit ingerlanneqartoq taamalu sakkutooqarnermi suliassavittut isigineqarsinnaasoq.
- Imm. 3. Aalajangersakkani makkunani aamma pineqarput sulineq, sulisitsisumi ingerlanneqanngitsoq, aamma imm. 2-mi taaneqartutut sulineq:

- 1) suliffigisami ataasiusumi sulisitsisut il. il. arlaliusut pillugit § 15, atortussanik assigisaannillu pilersuisut (tunniussuisut) allallu pillugit §§ 24-30 aamma sanatitsisut il. il. pillugit § 31,

- 2) sulianik ingerlatsineq pillugu §§ 32 aamma 33,
- 3) teknikikkut atortut pillugit §§ 36 aamma 37,
- 4) atortussiassat (stoffer) atortullu pillugit §§ 38 aamma 39,
- 5) aqqusinertigut assartuineq pillugu § 45 c, 6) ulorianartunik suliaqarnerni ukiukinnerpaaffissaq pillugu § 46, imm. 3.

Imm. 4. Suliffeqarnermut ministerip aalajangersinnaavaa, sakkutooqarfusuni aamma piliorfinni sulinermi avatangiisit pillugit maleruagassiat immikkut ittut atuutissasut.

§ 3. Inatsit silaannakkut angallannermut tunngatillugu taamaallaat atuutissaaq nunami sulinernut.

Imm. 2. Inatsit umiartornermut aalisarnermullu tunngatillugu taamaallaat makkununga atuutissaaq

1) umiarsuarnik, ilanngullugit aalisariutinik, usilersuinermit usingiaanermullu,

2) umiarsuarmi sanasutut tamatumunngalu nallersuunneqarsinnaasunik suliaqarnernut.

Imm. 3. Inatsit sinerissap avataani sulinermit atuutinnilaq.

§ 3 a. Suliffeqarnermut ministerip aalajangersinnaavaa inatsit annikitsuinnaasumik atortinneqassasoq sulianut sulisorineqartup angerlarsimaffiani ingerlanneqartussanut.

Kapitali 2

Sulliviit isumannaallisaanikkut peqqinnissakkullu sulinerat

Sulisuusut sulisitsisuusullu attaveqatigiinnerat

§ 4. Sullivinni ataatsimiit qulingiluanut amerlassusilinnik sulisulinni sulinermit isumannaallisaanikkut peqqinnissakkullu sulineq ingerlanneqassaaq sulisitsisup, sulisunillu siulersuisoqarpat, tak. § 18, taakkua sulisorisallu akornanni attaveqatigiinnikkut. Taamaattorli suliffeqarnermut ministeri isumannaallisaaneq pillugu aqqissuussinerup annertusarnissaa pillugu maleruagassiisinnaavoq, tamanna pisariaqarsorineqassatillugu.

Isumannaallisaaneq pillugu aqqissuussineq

§ 5. Sullivinni qulinik sinnerlugilluunniit sulisulinni sullivik isumannaallisaaneq peqqinnissarlu pillugit aqqissuussissaaq.

Imm. 2. Immikkoortoqarfimmi imaluunniit suliffusumi sulisunik siulersuisoq isumannaallisaanermut sinniisuutitaq peqatigalugu immikkoortoqarfimmi pineqartumi imaluunniit suliaqarfusumi pineqartumi isumannaallisaanermut suleqatigiissitaliussaaq.

Imm. 3. Immikkoortoqarfinni tamani imaluunniit suliffusuni tamani imaluunniit sulisunik siulersuisoqarfinni tamani sulisuusut isumannaallisaanermut peqqinnissamullu sinniisuutitassaminnik suleqatigiissitani ilannguttussanik qinersissapput. Sulisut kattuffimminnut sinniisaat isumannaallisaanermut sinniisussatut qinerneqarsinnaasaaq.

§ 6. Sullivinni 20-nik sinnerlugilluunniit, taamaattoq tak. § 7, imm. 7, sulisulinni isumannaallisaaneq pillugu ataatsimiititaliortoqassaaq. Sulinermit isumannaallisaanissamut ataatsinik marluusunilluunniit

suleqatigiissitaqareerpat, suleqatigiissitaliami imaluunniit suleqatigiissitaliani ilaasortat sulliviullu pisortaa imaluunniit sullivimmut akisussaasutut sinniisuutitaq isumannaallisaaneq pillugu ataatsimiititaliaassapput. Isumannaallisaaneq pillugu suleqatigiissitalianik arlalinnik pilersitsisoqarsimappat taakkunani sinniisuutitat akunnerminni ilaasortanik marlunnik aamma isumannaallisaaneq pillugu suleqatigiissitaliani sulisunik siulersuisut akunnerminni ilaasortanik marlunnik ataatsimiititaliamik pilersitsinissamut qinersissapput, ataatsimiititaliamut tassunga sulliviup pisortaa imaluunniit sullivimmut akisussaasutut sinniisuutitaq ilanngutissallutik. Isumannaallisaaneq pillugu ataatsimiititaliaq sulliviup iluani isumannaallisaaneq peqqinnissarlu pillugit sulinissamut pilersaarusiussaaq, siulersuissalluni, siunnersuisassalluni ilisimatitsissuteqartassallunilu aamma taamatut sulineramik nakkutiginnittuussalluni. Imm. 2. Sullivinnik Nakkutilliisoqarfimmiit nakkutiginnittuutitaq sullivimmut akuttunngitsunik takusaajartornermini sulliviup siulersorneqarneranut aamma isumannaallisaanermi sinniisuutitanut susassaqtunut, isumannaallisaaneq pillugu suleqatigiissitalianut ataatsimiititalianullu akuliuttassaaq. Taakku pisinnaatitaassapput apeqqutinik isumannaallisaanermut peqqinnissamullu tunngassutilinnik Sullivinnik Nakkutilliisoqarfimmut saqqummiussisarnissamut.

§ 7. Suliffeqarnermut ministeri sulliviit isumannaallisaaneq peqqinnissarlu pillugit sulinerannik annertusaanissaaq pillugu erseqqinnerusunik maleruagassiussaaq, tamatumani aamma isumannaallisaanermi sinniisuutitassanik qinersisarneq, taakkua pisinnaatitaaffii pisussaaffilu pillugit, isumannaallisaaneq pillugu suleqatigiissitalianik ataatsimiititalianillu pilersitsinissat taakkualu suliaasaat pillugit aamma isumannaallisaaneq pillugu sulineramik ulluinnarni siulersuinnermut malittarisassanik. Imm. 2. Suliffeqarnermut ministeri sulinermi avatangiisit pillugit malittarisassiussaaq, matumunnga ilanngullugit sanaartornerup iluani isumannaallisaanermik peqqinnissamillu ataqatigiissaarisussanut sulisilluni avatangiisinut tunngasunik ilinniartitaaneq, ilinniartitsisut piginnaasaat aamma ilinniartitaanermik neqeroortut pitsaassusaannik qulakkeerinnineq.

Imm. 3. Isumannaallisaanermik aaqqissusseqatigiit suliaasaat sulliviup sulisuusullu akornanni isumaqatigiissut malillugu annertusineqarsinnaapput aamma sullivimmut attuumassuteqavissutut avatangiisit pillugit apeqqutit ilaalersillugit. Suliffeqarnermut ministeri sulliviup suliffimmi avatangiisit pillugit apeqqutinik aaqqiiviginninnissaanut qularnaarisussanik erseqqinnerusunik maleruagassiorsinnaavoq.

Imm. 4. Sulliviit isumannaallisaaneq peqqinnissarlu pillugit sulinerat nakussassarniarlugu sunnuteqarnerulersinniarlugulu § 5 aamma § 6, imm. 1, suliffeqarnermut ministerip patsissarititai tunngavigalugit sanioqqunneqarsinnaapput

1) ilaatigut sulisut kattuffiannut imaluunniit kattuffinut aamma sulisitsisut kattuffiannut imaluunniit kattuffinut sulisitsisunulluunniit imaluunniit allanut taakkua tamatumunnga piginnaatitsis suteqarfigisaannut isumaqatigiissusiortoqarsimappat,

2) ilaatigullu sullivinni, nr. 1 malillugu isumaqatigiissuteqarfigineqartuni, sulisitsisuusup aamma

3) sullivimmi ilaannaaniluunniit sulisuusut akornanni isumaqatigiissusiortoqarsimappat.

Imm. 5. Suliffeqarnermut ministeri imm. 4 malillugu qanoqiliornikkut isumaqatigiissusiortarnissaaq pillugu erseqqinnerusunik maleruagassiorsinnaavoq.

Imm. 6. Imm. 4 malillugu isumaqatigiissusianik paasinerluinerujunnartut unioqqutitsinerillu aalajangiiffineqartassapput suliatigut akerleriissutinik suliarinnittarneq malillugu, imaluunniit tamanna periarfissaqartinnagu eqqartuussivitsigut.

Imm. 7. Suliffeqarnermut ministeri sulianut, suliatigut susassaqaqfinnut imaluunniit suliaqarfusunut tunngatillugu isumannaallisaaneq pillugu § 5-imi, § 6, imm. 1-imi, aamma § 8, imm. 3-mi malittarisassat malillugit sulinerup annertusaaviginissaa pisariaqarsorinartinnagu imaluunniit naleqquttuosorinartinnagu malittarisassanik taakkuninnga atuisitsinngitsoorsinnaavoq imaluunniit pissutsit immikkut ittut malillugit sakkukillileriviginissinnaalluni.

Imm. 8. Aammattaaq suliffeqarnermut ministeri ataqatigiissarisunut sulisilluni avatangiisinut tunngasunik ilinniartitaaneq pillugu piumasaqaammik § 7, imm. 2-miittumik atuisitsinngitsoortitsisinnaavoq, ilinniartitaaneq Kalaallit Nunaanni neqeroorutigineqanngippat.

§ 8. Sulisitsisup isumannaallisaaneq pillugu ataatsimiititaliami nammeneq ilaasortaanngikkuni pisussaaffigissavaa allamik akisussaassusilimmik imminut sinniisuuffiginitsisinissaq.

Imm. 2. Sulisitsisup isumagissavaa, isumannaallisaaneq pillugu suleqatigiissitaliani aamma ataatsimiititaliani ilaasortaat isumannaallisaaneq pillugu sulissuteqarnerminni pisussaaffimminnik isumaginninnissamut pissutsit atukkat malillugit naammaginnartumik periarfissaqartitaanissaat.

Imm. 3. Sulisitsisoq isumannaallisaaneq pillugu ataatsimiititaliami aamma suleqatigiissitaliani ilaasortanut periarfissaqartitsissaaq isumannaallisaanermut tunngassutilittut apeqqutinik pisariaqarneratut ilisimasaqalernissamut imaluunniit ilinniagaqarnissamut.

Imm. 4. Sulisitsisup isumannaallisaaneq pillugu suleqatigiissitaliat aamma ataatsimiititaliat periarfissaqartissavai sullivimmi isumannaallisaaneq peqqinnissarlu pillugit apeqqutit tungaasigut pilersaarusoqataanissamut.

Imm. 5. Sullivinni § 5 naapertorlugu isumannaallisaaneq pillugu ataatsinik arlaliusunilluunniit suleqatigiissitaliorfusuni, § 6-ili malillugu ataatsimiititalianik pilersitsiviususnaanngitsuni, sulisit-sisup isumagissavaa suliassat isumannaallisaaneq pillugu ataatsimiititalianit isumagineqartussat suleqatigiissitaliamik imaluunniit suleqatigiissitalianik suleqatiginnilluarnikkut ingerlanneqarnissaat.

§ 9. Isumannaallisaaneq pillugu sinniisuutitat suliassarititaasunik ingerlatsineranni aningaasartuutit sulisitsisup akilissavai aamma isumannaallisaanermi sinniisuutitat aningaasarsiassarigaluanit annaasaat, ilanngullugit isumannaallisaaneq pillugu pikkorissarnerni il. il. peqataasariaqarnermut atasmik aningaasartuutit aningaasarsiassarigaluanillu annaasat taarsertassavai. Aamma taamaassaaq sulisunik siulersuisut isumannaallisaaneq pillugu pikkorissarnerni il. il. peqataasariaqarneranni.

Imm. 2. Suliffeqarnermut ministerip isumannaallisaaneq pillugu suleqatigiissuni ilaasortat ilinniartitaaneranni aningaasartuutit tamakkiisumik ilaannaasumilluunniit matusiviginissaannut naalagaaffiup tapiissuteqartarnissaanik aalajangersakkat aalajangersarsinnaavai.

Imm. 3. Isumannaallisaaneq pillugu suleqatigiinni ilaasortaat sulisut kattuffinnut sinniisuutitaattulli, aamma sulianut tunngassutilinni tamatumunngaluunniit assingusuni oqaaseqartartuutitatulli, soraarsitaasinnaanermut allatulluunniit atugarisamikkut innarligaanissamut illersorneqartussaapput.

Imm. 4. Pissutsit imm. 1-imi 3-milu taaneqartut pillugit tamatumani aamma malittarisassiat suut atortitaanissaat, aamma malittarisassanik unioqqutitsinerit paasinerluinerilluunniit pillugit, isumaqatigiinngissutit suliatigut akerleriissutinik isumaqatigiissaasartunit tamannaluunniit periarfissaqartinnagu eqqartuussivitsigut aalajangiiffigineqartassapput.

§ 10. Suliffeqarnermut ministeri sulliviit isumannaallisaanermik sulineranni immikkut paasisimasalinnik ikiortissaqartitsisassaaq, tamanna sulisuusut isumannaallisarnissaannut peqqinnissaannullu pisariaqartinneqartillugu.

Kapitali 3

Malittarisassat nalinginnaasut

Sulisitsisoq

§ 11. Sulisitsisup isumagissavaa, sulinermi atugarisat isumannaallisaanikkut peqqinnissakkullu isumannaalluinnarnissaat. Tamatumani immikkut uku innersuunneqassapput:

- 1) sulianik ingerlatsineq pillugu kapitali 4,
- 2) suliaqarfusoq pillugu kapitali 5,
- 3) teknikikkut atortut pillugit kapitali 6 aamma
- 4) atortussiassat atortullu pillugit kapitali 7.

§ 11 a. Sulisitsisup isumagissavaa suliffimmi isumannaallisaanikkut peqqinnissakkullu pissutsinik suliat suunerat, suleriaatsit aamma sulianik ingerlatsinerit atorneqartut, aamma sulliviup annertussusia aaqqissuussaanelu tunngavigalugit allaganngukkamik naliliiffiginnittoqarnissaa. Suliffimmik naliliiffiginnissut sullivimmiititaassaaq sulliviullu siulersuisunit, sulisunit aamma Sullivinnik Nakkutilliisoqarfimmit takuneqarsinnaassaaq. Suliffimmik naliliiffiginnissut suliat, suleriaatsit aamma sulianik ingerlatsinerit il. il. allannguuteqaraangata, allannguutillu taakku sulinermi isumannaatsuunissamut peqqinnissamullu sunniuteqartussaagaangata, iluarsaanneqartassaaq, akuttunerpaamilli ukiut pingasunngorneri tamaasa.

Imm. 2. Suliffimmik naliliiffiginnissut ilaqartinneqassaaq sullivimmi avatangiisitigut ajornartorsiutinik sulliviup isummerfiginiagassaanik qanorlu iliornikkut tamakkua aaqqiivigineqarnissaannik. Naliliinermi makku pineqassapput:

- 1) Sulinermi avatangiisitigut pissutsinik sulliviup paasisassarsiorfiginninnera sumiissusersiuineru.
- 2) Sulliviup sulinermi avatangiisitigut ajornartorsiutaasunik nassuiaataa naliliiffiginninneru.
- 3) Sulliviup sulinermi avatangiisitigut ajornartorsiutinik aaqqiiviginninnissamut iliuusissanik piler
- 4) saarusiaani pisariaqartitanik tulleriissaarineq allattuinerlu.
- 5) Iliuusissanik pilersaarusiamik malinnaaffiginninnissamut najoqqutassat.

Imm. 3. Sulisitsisup suliffimmik naliliissummi, tak. imm. 1 aamma 2, pineqartunik aaqqiiviginninniarnissap pilersaarusiornerani, aaqqissuussinermi aamma naammassinninniarnermi isumannaatsuunissaaq pillugu suleqatigiissut imaluunnit sulisut ilaatittassavai.

Imm. 4. Suliffeqarnermut ministeri sulisitsisup imm. 1-3 malillugit pisussaaffi pillugit erseqqinnerusunik malittarisassiussaaq.

§ 12. Sulisitsisup isumagissavaa sulinerup isumannaallisaanikkut peqqinnissakkullu aarlerinartoqanngilluinnartumik ingerlanneqarnissaata nakkutigilluarneqarnissaa.

§ 13. Sulisitsisoq sulisorisanut ajunaarfusinnaasunik napparsimalissutaasinnaasunillu, suliaannut attuumassuteqarsinnaasunik, ilisimatitsisassaaq.

Imm. 2. Sulisitsisup tamatuma saniatigut isumagissavaa sulisorisat sulianik aarlerinartoqanngitsumik ingerlatsinissamut pisariaqarneratut ilinniartinneqarlutillu ilitersorneqarnissaat.

Imm. 3. Suliffeqarnermut ministeri sulisitsisup imm. 1 aamma 2 malillugit pisussaaffi pillugit erseqqinnerusunik malittarisassiorsinnaavoq.

13 a. Sakkortuumik pileriaannaasumillu aammalu pinngitsoorneqarsinnaanngitsumik aarlerinartorsiortoqarnerani sulisup suliffimminik qimatsinissaq pinnaatitaaffigaa.

Imm. 2. Sulisup imminut atugassarititaasut ajornerulersinneqarnerannik nalaataqartitaassanngilaq, sulisup suliffini imaluunniit piffik ulorianartoq imm. 1 malillugu qimatsinera pissutigalugu.

Imm. 3. Sulisut, imm. 1 aamma 2 malillugit pinnaatitaaffimminnik unioqqutitsiffiusut, taarsiiffigitinnissamut pinnaatitaaffeqarput.

§ 14. Sulisitsisup isumagissavaa kapitali 2 malillugu isumannaallisaaneq peqqinnissarlu pillugit suleqatigiittoqarnissaa, suleqatigiinnermilu peqataassaaq.

§ 15. Sulisitsisut arlaliusut, suliaqarfimmi ataasiusumi sulianik ingerlataqartitsisut, aamma kikkut suliffimmi ataasiusumi sulisorineqartut tamarmik, sulisorisat tamarmik sulinermi isumannaatsunik peqqinnartunillu atugaqartitaanissaat pillugu suleqatigiissapput.

Imm. 2. Suliffeqarnermut ministeri taamatut suleqatigiinnissaq pillugu erseqqinnerusunik malittarisassiorsinnaavoq.

§ 16. Sulisitsisoq pisussaavoq sulisorisat isumannaallisaaneq pillugu sinniisuutitaat sulisullu suliamikkut kattuffinnut sinniisuutitaat ilisimatissallugit Sullivinnik Nakkutilliisoqarfiup imaluunniit pisortatut oqartussaaitat imaluunniit suliffeqarfiup § 57-imi taaneqartutut peqqussutigisaannik. Sulisitsisoq taamatuttaaq pisussaavoq isumannaallisaaneq pillugu sinniisuutitanut sulisullu sinniisuinut allanut, peqqussutaasunik ilisimatinneqarnissamik kissaateqartunut, ilisimatitsisarnissamut.

Imm. 2. Suliffimmi isumannaallisaaneq pillugu sinniisuutitaqanngippat imaluunniit sulisut sinniiseqanngippata, sulisorisat imm. 1-imi oqaaseqatigiit siulliit malillugit peqqussutaasunik ilisimatinneqartassapput.

§ 17. Sullivinnik Nakkutilliisoqarfik tamatuminnga kissaateqaraangat, imaluunniimmi pissutsit tamatumunnga tunngavissaqartitsigaangata, sulisitsisoq misissuisitsisassaaq, misissugassanik tiguisitsisassalluni imaluunniit misissuiartortitsisassalluni, soorlu immaqa immikkut paasisimasalitsigut, paasiarlugu sulinermi pissutsit isumannaallisaanikkut peqqinnissakkullu aarlerinartoqanngilluinnarnersut.

§ 17 a. Sulisitsisoq Sullivinnik Nakkutilliisoqarfimmut nalunaaruteqartarlunilu malittarisassat suliffeqarnermut ministerimit aalajangersarneqartut malillugit nalunaarsuiffinnut allattuisassaaq.

Imm. 2. Sullivinnik Nakkutilliisoqarfimmi pisortaq kisitsisitigut paasissutissiornissamut atugassatut sulisitsisumiit makku pillugit paasissutisseqqusinnaavoq

1) sulisorisat amerlassusiat, suaassuseq, ukioqortussuseq peqqissutsimullu tunngasut,

- 2) maskiinat, maskiinat pisataat, immiussiviit, ineriikkatut suliatut pisatsersuutit, apparatit, sakkut
- 3) allallu teknikikkut atortut,
- 4) atortussiat atortullu, aamma
- 5) pissutsit allat sulinermi avatangiisitigut pingaarutillit.

Imm.3. Kisitsisitigut paasissutissat tamanut saqqummiunneqassappata aternik imaluunnit sullivinnik taasisoqassanngilaq.

Sullivinni siulersuisut allallu

§ 17 b. Sulisitsisup pisussaaffi pillugit inatsimmi aalajangersakkat aamma kimulluunniit sullivimmik siulersuisumut imaluunniit siulersuisuni peqataasumut atuutissapput.

Sulisunik aqutsisoq

§ 18. Sulisunik aqutsisumik pineqarpoq kinaluunniit, taamaallaat sulisitsisoq sinnerlugu sulianik annertunerusunilluunniit ingerlatalik sullivimmi taassumaluunniit ilaani sulisunik aqutsisutut imaluunniit nakkutilliisutut.

§ 19. Sulisunik aqutsisup peqataaffigissavaa suliaasaqarfimmini sulinermi atugarisat isumannaallisaanikkut peqqinnissakkullu aarlerinangilluinnarnissaat. Sulisunik aqutsisup aamma tamatumani nakkutigissavaa isumannaallisaaneq peqqinnissarlu siuarsarniarlugit aalajangiinerit siunertarisaminnut naapertuuttumik sunniuteqartinnissaat.

Imm. 2. Sulisunik aqutsiup kukkunernik amigaatinilluunniit, ajunaarnernik napparsimalernernilluunniit nassataqarsinnaasunik, ilisimannileruni isumagissavaa aarlerinartuerutitsiniaanissaq. Sulisunik aqutsisoq sumiiffimmi iliuuseqarnermigut arlerinartuerussinnaanngippat sulisitsisumut pissusiusunik ilisimatitsipallassaaq.

§ 20. Sulisunik aqutsisoq isumannaallisaaneq peqqinnissarlu pillugit suleqatigiinnermi peqataassaaq, tak. kapitali 2, § 15 aamma § 31.

Sulisorisat

§ 21. Sulisorisat peqataaffigissavaat suliaqarfigisaminni sulinermi pissutsit isumannaallisaanikkut peqqinnissakkullu aarlerinaalluinnarnissaat, tamatumani aamma isumannaallisaaneq peqqinnissarlu siuarsarniarlugit aalajangiinerit siunertarisaminnut naapertuuttumik sunniuteqarnissaat.

Imm. 2. Sulisorisat kukkunernik amigaatinilluunniit, ajunaarnik napparsimalernernilluunniit nassataqarsinnaasunik, ilisimasaqalerunik namminnerlu aaqqiivigisinnaanngikkunikkik isumannaal-lisaaneq pillugu suleqatigiissuni ilaasortaasumut, sulisunik aqutsisumut imaluunniit sulisitsisumut tamanna nalunaarutigissavaat.

Imm. 3. Kialuunniit, suliamik soorlu iluarsaassinermik ikkussuinermilluunniit suliaqartup, isumannaallisaat peertariaqarsimaguniuk sianigissavaa taassuma suliamik naammassinnereernikkut inisseqqinneqarnissaa imaluunniit allap taamatulli isumannaatsigisup inissinnissaa.

§ 22. Sulisorisat isumannaallisaaneq peqqinnissarlu pillugit suleqatigiinnermi peqataassapput, tak. kapitali 2.

§ 23. Kikkulluunniit suliffimmi sulisitsisut arlaliusut suliaqartitsivigisaani sulisuusut malittarisassanik sulliviit suleqatigiinnissaannut atuuttunik, tak. §§ 15 aamma 31, malittarisassat suliarisaminnut atuuttut saniatigut malinnittussaapput.

Imm. 2. Kikkulluunniit allat sulliveqarfiini sulisut isumannaallisaaneq peqqinnissarlu pillugit sullivimmut tassunga malittarisassanik suliaminnut tunngatillugu malittarisassat atuuttut saniatigut malinnittussaapput.

Atortunik tunniussuisut, ikkussuisartut, iluarsaasartut aamma pilersaarusiortartut allallu

§ 24. Kinaluunniit maskiinanik, maskiinat pisataannik, immiussivinnik, ineriikkatut ikkussugassanik, apparatinik, sakkunik allanilluunniit teknikikkut atortunik tunniussisup, isumagisassanngortitsisup imaluunniit saqqummersitsisup isumagissavaa tamakkua atugassatut tunniunneqassagunik imaluunniit saqqummersinneqassagunik pisariaqarneratut illersuusigaasimanissaat aamma isumannaatsuunissamut peqqinnissamulluunniit aarlerinartorsiortitsisinnaanatik siunertarisanut naapertuuttumik atorneqarsinnaanissaat, tak. kapitali 6. Atornissaannut, aserfallatsaalinissaannut, assartornissaannut ikkussornissaannullu najoqqutassat paasiuminartut tunniussinnermi ilaatinneqartassapput.

Imm. 2. Teknikikkut atortut atoriaannaat tuniniaqqitassatut, attartortitassatut imaluunniit atukkiussassatut tunniunneqassappata imaluunniit isumagisassanngortinneqassappata pisussaaffiit taama ittut aamma atuutissapput.

Imm. 3. Sullivinnik Nakkutilliisoqarfiup tamanna piumasarippagu, imaluunniimmi pissutsit tamatumunnga tunngavissaqartitsippata, pineqartunik eqqussuisoq imaluunniit piliortoq misissuisitsisassaaq, misissugassanik tiguisitsillunuunniit misissuiartortitsisassaaq, soorlu immaqa immikkut paasisimasalitsigut, paasiinarlugu teknikikkut atortoq isumannaallisaanikkut peqqinnissakkullu aarlerinaalluinnarnersoq.

Imm. 4. Sullivinnik Nakkutilliisoqarfiup tamanna kissatigippagu eqqussuisup imaluunniit piliortup paasissutissiissutigissavaa teknikikkut atortut isumannaatsuunissamut peqqinnissamulluunniit aarlerinaateqarsinnaasut tunineqarsimasut annertussusiat.

§ 25. Maskiinat Kalaallit Nunaanni tunniunneqartussat imaluunniit saqqummersinneqartussat tamarmik piliortuusup imaluunniit maskiinanut eqqussukkanut tunngatillugu eqqussuisup aqqanik imaluunniit najugaanik paasissutissartaqartitaassapput, allatulluunniit ilisarnaasigaassallutik piliortup taamatullu eqqussuisup kinaanera takulertorneqartussanngorlugu.

§ 26. Kialuunniit, namminersortutut ingerlatalittut teknikikkut atortumik ikkussuisussap, sanaqqiisussap imaluunniit pingaarnertut iluarsaassisussap, misissortassavaa atortumut tunngatillugu isumannaatsuunissakkut peqqussutaasut ilitseruusiallu naammassineqarsimanerat.

Imm. 2. Ataasiinnaq taassumaluunniit pisatai (immikkuualuttui) iluarsaanneqassappata iluarsaassisup misissussavaa isumannaatsuunissakkut peqqussutaasut ilitseruusiallu iluarsaassamut atuuttut

naammassineqarsimanerat. Iluarsaassisup sulinermini malugisaqaruni kukkunernik amigaatinilluunniit allanik, isumannaatsuunissamut pingaarutilinnik, piginnittuusoq atuisorluunniit tamakkuninnga ilisimatissavaa.

§ 27. Kialuunniit teknikikkut atortumut, tunisassioffimmut imaluunniit illuliassamut sanaartugassanulluunniit titartakkatigut pilersaarusanik tunniussisup sulianik ingerlatsinermi aamma sanaamik imaluunniit pilioffimmi il. il. inikkamik ingerlatsinermi isumannaatsuunissaq peqqinnissarlut pingaartittassavaa. Tamannattaq atuutissaq kimulluunniit pilersaarummik taama ittumik nakkutilliisuusumut imaluunniit sulinermi avatangiisinut tunngassutillit pillugit siunnersuisuusumut.

§ 27 a. Kialuunniit, sullissinissamik neqerooruteqartup, neqeroorutissami suliarinerani misissortassavaa, suliaasnik ingerlatsinermi isumannaatsuunissap peqqinnissallu pingaartinneqarsimanissaat.

Neqerooruteqartup aammattaq isumagissavaa neqeroorutaasussap naleqquttunik paasissutissartaqarnissaa suliaasnik ingerlatsinissamut attuumassutilittut sulinermi avatangiissat immikkut ittut, pingaarutillit pillugit suliaasnik ingerlatsinissap tamakkuninnga ilisimasaqarnissaa siunertaralugu.

Imm. 2. Neqerooruteqartup aamma peqataaffigissavaa, suliaasatut neqeroorutaasut sulitsisumit suliaassinneqartussamit isumannaatsuunissakkut peqqinnissakkullu aarlerinangilluinnartumik ingerlanneqarsinnaanissaat.

§ 28. §§ 24-mi, 25-mi, 27-mi aamma 29, imm. 2-mi malittarisassat aamma atuutissapput atortussianik atortunillu isumannaatsuunissamut peqqinnissamulluunniit aarlerinaateqarsinnaasunik tunniussuisunut allanullu.

§ 29. Suliffeqarnermut ministeri pissutsit §§ 24-28-mi eqqartorneqartut pillugit erseqqinnerusunik malittarisassiorsinnaavoq.

Imm. 2. §§ 24-28-mi malittarisassat inatsit malillugu atuisussamut pisussaaffeerutitsissanngillat.

§ 30. Immikkut ittunik pissutissaqartillugu, suliffeqarnermut ministeri malittarisassiorsinnaavoq imaluunniit aalajangersaasinnaavoq, §§ 24-28-mi piumasaqaatinik saneqqutsissutissanik.

Aalajangersakkat taama ittut aammattaq ataasiakkaatigut immikkut ittunik pissutissaqartillugu Sullivinnik Nakkutilliisoqarfimmit aalajangersarneqartarsinnaapput.

Sanatitsisut il. il.

§ 31. Sanatitsisup peqataaffigissavaa, sulisitsisup illuliornernik sanaartornernillu isumannaatsuunissakkut peqqinnissakkullu aarlerinangilluinnartumik ingerlatsinissaanissaa.

Imm. 2. Illuliortiternermik sanaartornermillu aalajangersumik annertussusilimmik ingerlataqarfimmi, sulisitsisunik arlaliusunik suliaqarfimmi taannaasumi sulisoqartumi sanatitsisoq pilersaarusiortassaaq, iliuusissanik killilersuillunilu ataqatigiissaarisassaaq sulisorisat isumannaallisarnissaannut peqqinnissaannullu siuarsaaniutitut.

Imm. 3. Suliffeqarnermut ministeri sanatitsisup imm. 2 malillugu pisussaaffi pillugit erseqqinnerusunik malittarisassiussaaq aamma makku pillugit

- 1) ulisitsisut ataasiakkaat suliasat aallarneqalersinnagit ataatsimut suliaqarfusuni suliasaannik killilersuineq,
- 2) sanaffiusussaq pilersinneqalersinnagu isumannaallisaanermut peqqinnissamullu pilersaarusionerq,
- 3) ataatsimut suliaqarfusuni suliat aallarnereernerisigut isumannaallisaanermut peqqinnissamullu siuarsaatitut sulissutigisassanik ataqatigiissaarineq, aamma
- 4) suliffiusumi isumannaallisaanikkut peqqinnissakkullu sulissuteqarnernik ataqatigiissarinernik isumaginnittussamik toqqaanissaq, isumannaallisaanikkut peqqinnissakkullu apeqqutininik tamatumanilu ilinniartitaanernik pisariaqarneratut ilisimasalimmik immikkut.

Imm. 4. Suliffeqarnermut ministeri erseqqinnerusunik malittarisassiussaaq sanatitsisup illuliassanik sanaartugassanillu annertunerusunik Sullivinnik Nakkutilliisoqarfimmut nalunaarutiginnittusaaq pillugu.

Kapitali 4

Sulianik ingerlatsineq

§ 32. Suliasat pilersaarusionerqartassapput, aqqissuunneqarlutik aamma isumannaallisaanikkut peqqinnissakkullu aarlerinartoqanngilluinnartumik ingerlanneqartassapput.

Imm. 2. Maligassiat najoqqutassiallu akuerisat isumannaallisaanermut peqqinnissamullu pingaarutillit malinneqartassapput, suliffeqarnermut ministeri allatut aalajangiisimanngippat.

§ 33. Suliffeqarnermut ministeri piumasaqaatit suliasat aarlerinannngilluinnartumik pilersaarusiukkatut, aqqissuussatut ingerlanneqartutullu naatsorsuunneqarnissaannut naammassineqarsimasussat pillugit erseqqinnerusunik malittarisassiorsinnaavoq ilanngullugit

- 1) immikkut ulorianaatilinnik suliaqarnissap, sulianik ingerlassinissat suleriaaseqarnissallu inerteqqutaanissaat pillugu,
- 2) imminut illersuutissat sullisissallu immikkut ittut pillugit,
- 3) suliasat, ajunaarfiunissamut imaluunniit napparsimalernissamut annertuumik aarlerinartorsior fiussinnaasut, ilanngullugit qaartiterinerit, taamaallaat inunnit erseqqinnerusumik taasamik ilinniagaqarsimanermut imaluunniit misilitsissimanermut allagartalinneq ingerlanneqarsinnaanerat pillugu, aamma
- 4) isumannaatsuunissaq imaluunniit peqqinnissaq pingaarnerutittariaqartillugu sulinissaq, sulianik ingerlatsinissaq suleriaasissarlugu pillugit pilersaarusiortoqartarnissaa, pilersaarusiallu taama ittut taakkunanilu allannguutit ingerlanneqalersinnagit Sullivinnik Nakkutilliisoqarfimmut oqaaseqarfigisassatut imaluunniit akuersissutigisassatut saqqummiunneqartarnissaat pillugit.

Imm. 2. Malittarisassiani malitassatut najoqqutassatullu innersuussisoqartarsinnaavoq, tamakku erseqqissumik, aamma ullulersuinertut, taaneqarsimagaangata.

Kapitali 5

Suliaqarfigisaaq

§ 34. Suliaqarfigisaq aaqqissuunneqartassaaq isumannaallisaanikkut peqqinnissakkullu aarlerinaalluinnartunngorlugu.

Imm. 2. Maligassiat najoqqutassiallu akuerisat, isumannaallisaanikkut peqqinnissakkulluunniit pingaarutillit, malinneqassapput, suliffeqarnermut ministeri allatut aalajangiisimanngippat.

§ 35. Suliffeqarnermut ministeri aalajangersimasumik, utaqqisaannarmik, nikerartumik silamiittutullu suliffinnik aaqqissuussineq pillugu erseqqinnerusunik, ilanngullugit aatsitassarsiorfinni ingerlatsinermut atsumik immikkut ittumik iliuusissat pillugit, malittarisassiorsinnaavoq.

Imm. 2. Malittarisassiani malitassatut najoqqutassatullu innersuussisoqartarsinnaavoq tamakku erseqqissumik, aamma ullulersuinertut, taaneqarsimagaangata.

Imm. 3. Suliffeqarnermut ministeri tamatuma saniatigut makku pillugit malittarisassiorsinnaavoq

1) sulliviliornissamut imaluunniit allanngortiterinissamut titartakkatigut pilersaarusi at assigisaallu suliassanik ingerlatsisoqalersinnagu Sullivinnik Nakkutilliisoqarfimmut oqaaseqarfigisassatut saqqummiunneqartarnissaat,

2) ininik, teknikikkut atortoqarfinnik il. il. aaqqissuussinissaq imaluunniit allanngortitsinissaq pillugu pilersaarutigisat, suli atut ingerlanneqalersinnagit Sullivinnik Nakkutilliisoqarfimmut oqaaseqarfigisassatut imaluunniit akuersissutigisassatut saqqummiunneqartarnissaat, aamma

3) illuutit, init, nunamernillu il. il. inuussutissarsiutitut ingerlataqarnissamut atukkiunneqannginnissaat, init il. il. atorfissaattut siunertanut atorsinnaanerat pillugu apeqqut Sullivinnik Nakkutilliisoqarfimmut oqaaseqarfigisassatut imaluunniit akuersissutigisassatut saqqummiunneqareersimatinnagu.

Kapitali 6

Teknikikkut atortut

§ 36. Teknikikkut atortut aaqqissuussaallutillu atorneqartassapput isumannaallisaanrmut peqqinnissamullu aarlerinaalluinnartumik. Atuinissamik malittarisassat aamma atortuutinneqassapput aserfallattaaliinnermut, eqqiaanermut, iluarsaassinnermut assigisaannullu.

Imm. 2. Maligassiat najoqqutassiallu akuerisat, isumannaallisaanikkut peqqinnissakkulluunniit pingaarutillit, malinneqassapput, suliffeqarnermut ministeri allatut aalajangiisimanngippat.

§ 37. Suliffeqarnermut ministeri teknikikkut atortut pillugit malittarisassiorsinnaavoq, ilanngullugit makku pillugit,

1) teknikikkut atortunik immikkut ulorianaatilinnik piliornissaq, eqqussuinissaq, allanut tunniussinissaq, isumagisassanngortitsinissaq, saqqummersitsinissaq imaluunniit atuinissaq inerteqqutaassasoq,

2) teknikikkut atortunik sanatitassatut, suliassatut saqqummersitassatullu pilersaarusi at Sullivinnik Nakkutilliisoqarfimmut saqqummiunneqartarnissaat oqaaseqaateqarfigisassatut imaluunniit akuersissutigisassatut,

3) teknikikkut atortumik allanut tunniunneqalersinnagu imaluunniit atuisussamut isumagisassanngortinneqalersinnagu imaluunniit atorneqalersinnagu Sullivinnik Nakkutilliisoqarfimmut akuersissutigisassanngortitsisarnissaq,

4) teknikikkut atortup Sullivinnik Nakkutilliisoqarfimmut nalunaarutaasarnissaa imaluunniit misiligagassanngortitaasarnissaa allatulluunniit nakkutilliinikkut misissugassanngortitaasarnissaa,

tamatumani aamma piffissani aalajangersimasukkuutaani, aamma

5) teknikikkut atortut nalunaqqutsigaanissaat, piliortup taamatullu eqqussuisup kinaanera takulertorneqartussanngorlugu imaluunniit atortut atorneqartut paasissutissartaat, suussusii suminngaanneersuunerallu, aamma akuersissutaasut, misiligaasimanerit pissutsilluunniit allat sulinermi avatangiisinut pingaarutillit paasineqartussanngorlugit.

Imm. 2. Malittarisassiani malitassatut najoqqutassatullu innersuussisoqartarsinnaavoq tamakku erseqqissumik, aamma ullulersuinertut, taaneqarsimagaangata.

Kapitali 7

Atortussiat atortullu

§ 38. Atortussiat atortullu isumannaallisaanermut peqqinnissamulluunniit ulorianaateqarsinnaasut tamatumunngaluunniit innarliisinnaasut aatsaat piliarineqarlutillu atorneqartassapput sulisorisat ajunaarnissamut nappaatinullu illersuusersorluarlugit sulinerne suleriaatsinilu.

Imm. 2. Maligassiat najoqqutassiallu akuerisat, isumannaallisaanikkut peqqinnissakkulluunniit pingaarutillit, malinneqassapput, suliffeqarnermut ministeri allatut aalajangiisimanngippat.

§ 39. Suliffeqarnermut ministeri atortussianik atortunillu piliorneq, eqqussuineq, toqqortarinnineq, assartuineq atuinerlu pillugit malittarisassiorsinnaavoq, tamatumani aamma makku pillugit

1) atortussianik atortunillu, sulinerne atorneqartussanik, poortuutaannilluunniit immikkut nalunaqqutsersuineq,

2) sulinerne peqqissaarussinissaq pillugu silaannaap mingutsitaaneraneq uuttortaanissamut pisussaaneq,

3) atortussianik atortunillu, pissutsinik taakkua ulorianarnerannik naliliiffiginninnermut pingaarutilinnik, taasaqarnissamut pisussaaffittalimmik nalunaarutiginninneq, aamma uku pillugit isumannaallisaaneq pillugu paasissutissat allattorsimaffii, teknikikkut paasissutissat allattorsimaffii assigisaallu pilersuisuneersut kiisalu sullivinnik atuneq pillugu ilitersuutit sulisitsisuneersut.

Imm. 2. Suliffeqarnermut ministeri malittarisassiisnaavoq atortussianik atortunillu, isumannaallisaanermut peqqinnissamulluunniit ulorianaateqarsinnaasunik imaluunniimmi tamatuminnga innarliisinnaasunik piliornissap, eqqussuinissap atuinissallu inerteqqutaanissaat pillugu.

Imm. 3. Malittarisassiani malitassatut najoqqutassatullu innersuussisoqartarsinnaavoq tamakku erseqqissumik, aamma ullulersuinertut, taaneqarsimagaangata.

Imm. 4. Suliassaqartitsinerne ministerip aalajangersarsinnaavai atortussiat atortullu pillugit naliusutigut killiliissutissanik aalajangersaasnaavoq aamma atortussiat atortullu isumannaatsuunissamut peqqinnissamulluunniit ulorianaatilittut tamatuminngaluunniimmi innarliisinnaasutut naatsorsuussat allattorsimaffinik suliarinnissinnaapput.

Imm. 5. Akuutissat imaluunniit atortussat, isumannaallisaanermut peqqissutsimulluunniit ulorianarsinnaasut, imaluunniit taakkuninnga ajornerulersitsisinnaasut, akuutissanik imaluunniit atortussanik uloriananngitsunik, ulorianannginnerusunik imaluunniit annikinnerusumik ajoqutaasunik taarserneqarsinnaappata atorneqaqqusaannginnerat pillugu maleruagassanik suliassaqartitsinerne ministeri aalajangersaasnaavoq.

Imm. 6. Akuutissat atortussallu, isumannaallisaanermut peqqissutsimullu ulorianarsinnaasut, imaluunniit taakkuninnga ajornerulersitsisinnaasut, Sullivinnik Nakkutilliisoqarfik oqaaseqaateqartinnagu imaluunniit

akuersissuteqartinnagu siunertanut aalajangersimasunut atorneqaqqusaannginnerat pillugu maleruagassanik suliaasaqartitsinermut ministeri aalajangersaasinnaavoq.

Kapitali 8

Piffissaq qasuersaarfissaq aamma ulloq unnuarlu sulinngiffeqarneq

§ 40. Piffissaq suliffissaq aaqqissuunneqartassaaq sulisorisat piffissap nal. akunnerinik 24-nik sivilissusillip ingerlanerani minnerpaamik nal. akunnerini 11-ni ataannartuni qasuersaarfissaqartussanngorlugit, taamaattoq tak. § 45.

Imm. 2. Piffissaq qasuersaarfissaq nal. akunnerinut arfineqpingasunut sivikillisinneqarsinnaavoq imaaliornikkut

1) sullivinni, nikittaattunik sulisoqartuni ullut tamaasa imaluunniit sapaatit akunneri tamaasa suleqatigiittut siulliit naammassinerisa tulluuttullu aallartinnerisa akornanni piffissaq qasuersaarfissaq pitinneqarsinnaatinnagu, nikittaannikkut aamma

2) nunalerinermik aamma aallaaniarnermik piniarnermillu suliaqarnerni qaammatisiutit ukiuata ingerlanerani ullut 30-t tikillugit, taamaattoq tak. § 43.

Imm. 3. Usilersuineq usingiaanerlu, aalajangersumik atorfinitsinnagit sulisoqarnikkut ingerlanneqarnerusussaq, aamma tamatumunga attuumassutilittut suliaqarfusariaqartut imm. 1-imi 2-milu pineqanngillat. Suliffeqarnermut ministeri qaangiuttoorluni sulereernikkut sulisut pineqartut sulisorineqaqqilersinnagit piffissaq sivikinnerpaamik qasuersaarfissaq pillugu erseqqinnerusunik malittarisassiorsinnaavoq.

§ 41. Ullut unnuallu arfineqmarluk ingerlaneri tamaasa sulisorisat sapaatit akunneranoortumik ullormik unnuamillu ataatsimik sulinngiffeqarfissaqassapput, ullormut qasuersaarfusumut ataannartinneqartussamik. Sapaatit akunneranoortumik ulloq unnuarlu sulinngiffeqarfissaq sapinngisamik sapaatikkut pitinniarneqartassaaq ajornanngippallu sullivimmi sulisuusunut tamanut ataatsikkut.

Imm. 2. Imm. 2-mi oqaaseqatigiinni siullerni maleruagassiaq atuutissanngilaq nunalerinermut, naatitsivilerinermut, aallaaniarnermut piniarnermullu.

Imm. 3. Inunnik, uumasunik naasunillu paarinninnermik suliaqarnerni kiisalu sulinerni, nalilinnik piunnartitsinissaq pillugu pisarialinni, sapaatit akunnikkaartumik ulloq unnuarlu sulinngiffeqarfusussaq kinguartikkallarneqartarsinnaavoq, illersorniagassat imaluunniit sullissinerit atasinnaanissaasa imaluunniit taamatulli tunisassiornissap tamanna pisariaqartippassuk. Suliffeqarnermut ministeri tamanna pillugu erseqqinnerusunik malittarisassiorsinnaavoq.

§ 42. §§ 40 aamma 41 pisariaqartitsineq naapertorlugu saneqqunneqarsinnaapput, pinngortitap pissusii, ajunaarnerit, maskiinanik aseroortoortitsinerit assigisaasulluunniit ilisimariinngisamik pisut sullivimmik pisarnertut ingerlatsinermut akornusiitillugit imaluunniit akornusiisimatillugit. Saneqqutsineq nakkutilliinermut allattaavinnut allanneqartassaaq imaluunniit allatut taamatulli uppernarsaaserneqartassaaq.

§ 43. Suliat aamma suliatigut susassaqarfigisat imaluunniit suleriaatsit immikkut ittut pillugit pissutsit tamanna pisariaqartippassuk suliffeqarnermut ministeri makku pillugit malittarisassiorsinnaavoq

1) ullormoortumik piffissaq qasuersaarfissaq, ilanngullugit ullormoortumik piffissap qasuersaarfissap nal.akunnerinut arfineqpingasunut sivikillinissaa kiisalu piffissap qasuersaarfissap qaqugukkut pinissaa, aamma

2) sapaatit akunneranoortumik ulloq unnuarlu sulinngiffeqarfissaq, ilanngullugu ulloq unnuarlu sulinngiffeqarfiup allamut inissinneqarnissaa.

§ 44. Inuit qullersatut atorfillit kiisalu sinniisuutitat nioqqusianillu tuniniaasorisat, sulliviup aalajangersimasumik suliaqarfata avataani suliallit, aatsaat §§ 40-mi aamma 41-mi pineqartunut ilaatitaassapput tamanna suliffeqarnermut ministerimit erseqqinnerusumik aalajangerneqarsimappat.

§ 45. Suliffeqarnermut ministeri malittarisassiorsinnaavoq isumaqatigiissuteqarnikkut patsisissaatitat suut tunngavigalugit §§ 40-mik aamma 41-mik saneqqutitsisinnaaneq pillugu.

§ 45 a. §§ 40-45 malillugit saneqqutisisoqartillugu taamatulli taarsiissutitut piffissanik qasuersaarfissaqartitsisoqartassaaq imaluunniit ulloq unnuarlu sulinngiffeqartitsisoqartassaaq, imaluunniit taarsiissutitut qasuersaarfeqartitsinissaq imaluunniit ulloq unnuarlu sulinngiffeqartitsinissaq pissutsinit qaqutigoortumik ajornartitaassappat naleqquttumik illersuiniartoqartassaaq. Suliffeqarnermut ministerip aalajangersarsinnaavaa oqaaseqatigiit siullit inunntut qullersatut atorfilinnut atortinneqannginnissaat.

§ 45 b. Suliffeqarnermut ministeri malittarisassiorsinnaavoq sulianut isumannaallisaanermik peqqinnissamillu aarlerinartorsiortitserujussuarsinnaasunut tunngatillugu piffissamik suliffissamik sivikinnerutitsinissaq pillugu.

§ 45 c. Malittarisassat §§ 43 aamma 45 b malillugit aalajangersarneqartussat atortuutinneqarsinnaapput kikkunnulluunniit qamutini ingelatsisunut imaluunniit tamakkunani sulialinnut, aamma sulinernut sulisitsisumi sulinerunngitsunut.

Kapitali 9

Inuusuttut 18-it inorlugit ukiullit

§ 45 d. Kapitalimi matumani malittarisassat atortuutinneqassapput inuusuttunut 18-it inorlugit ukiulinnut sulisitsisumi sulianik ingerlataqartunut, aamma sulianut § 2, imm. 2, nr. 1-imi 2-milu taaneqartunut.

§ 46. Inuusuttunik 18-it inorlugit ukiulinnik sulisoqarnermi suliap pilersaarusiornissaani, aaqqissuunnissaanni ingerlannissaanilu inuusuttup ukiui, peqqissusia aamma timikkut tarnikkullu inerissimassusia aamma atuarnermi allatulluunniit ilinniagaqarnermi sunniivigineqarnera pingaartinneqartassapput.

Imm. 2. Inuusuttut 15-it inorlugit ukiullit imaluunniit atuartussaannermi pineqartut suliani sulisorineqassanngillat, taamaattoq tak. imm. 4-6.

Imm. 3. Suliffeqarnermut ministeri malittarisassiorsinnaavoq inuusuttut sulisorineqartarnerat pillugu, ilanngullugit suleriaatsini aalajangersimasuni 15-inik ukiulinniit ukioqqortunerunissamut killissarititat

pillugit, suliat isumannaatsuunissakkut peqqinnissakkullu aarlerinangilluinnartumik ingerlanneqarsinnaanissaat qularnaarniarlugu. Inuusuttut ilinniagaqartut pillugit immikkut ittunik malittarisassiortoqarsinnaavoq.

Imm. 4. Suliffeqarnermut ministerip aalajangersarsinnaavaa ilaannikkuinnaq imaluunniit sivikitsuinnarmik suliaqarnissap, sulisitsisup angerlarsimaffiani imaluunniit sulisitsisumut ilaqutaasuinnarnit illumi inoqutaasunit ingerlanneqartussap imm. 2-mi aamma §§ 47-mi 48-milu inerteqqutaasunut patsisissaatitat killilersuutillu erseqqinnerusumik taaneqartut tunngavigalugit ilaatinneqannginnissaa.

Naatsorsuutigineqassaaq suliat inuusuttut isumannaatsuunissaannut peqqinnissaannulluunniit aarlerinartorsiortitsissanngitsut.

Imm. 5. Inuusuttunut, sulisitsisup ilaqutaanut inoqutaanullu ilaasunut tunngatillugu suliffeqarnermut ministeri imm. 3 naapertorlugu patsisissaatitat killilersuutillu erseqqinnerusumik taasat tunngavigalugit ukiutigut killissarititaniit saneqqutsissutissanik aalajangersaasinnaavoq.

Imm. 6. Suliffeqarnermut ministeri aamma makku pillugit aalajangersaasinnaavoq,

1) inuusuttut 13-inik ukioqalereersimasut, suleriaatsit erseqqinnerusumik killilikkat iluanni aamma patsisissaatitat atugassarititalu erseqqinnerusumik aalajangersarneqartut tunngavigalugit oqinnerusunik suliaqarsinnaasut,

2) imm. 2-mi aamma § 47-mi inerteqqut saneqqunneqarsinnaasoq inuusuttunut 14-inik ukioqalereersimasunut ilinniarnermillu ilaatut sulianik ingerlataqartunut imaluunniit inatsisit naapertorlugit atuartussaannermt taarsiullugu sulilersussanut tunngatillugu,

3) imm. 2-mi aamma § 47-mi inerteqqut saneqqunneqarsinnaasoq inuusuttut kulturikkut eqqumiitsuliornikkulluunniit, timersornernik aqqqissuussinerni imaluunniit filmiliortuni assigisaattulluunniit iliuutsini il. il. patsisissaatitat atugassarititalu erseqqinnerusumik aalajangersarneqartut tunngavigalugit peqataassatillugit, taamaattorli inuusuttut 13-it inorlugit ukiullit eqqarsaatigalugit, pisussani ataasiakkaani akuersisitsiniaasoqqaartassasoq, aamma

4) imm. 2-mi aamma §§ 47-mi 48-milu inerteqqut patsisissaatitat atugassarititalu erseqqinnerusumik aalajangersarneqartut tunngavigalugit saneqqunneqarsinnaassasoq inuusuttut aallaaniarnerni piniarnernilu peqataanissaannut tunngatillugu.

5) Imm. 7. Sulisitsisup inuusuttunik 15-it inorlugit ukiulinnik imaluunniit atuartussaannermt pineqartunik sulisoqassatilluni angajoqqaat imaluunniit taakku sinnerlugit nakkutiginnittuusoq su-lisorinninnissamik ilisimatittassavai, ilanngullugit piffissap suliffissap sivilissusissaa aamma suliamut attuumassuteqarunnartumik ajunaarsinnaannermt napparsimalersinnaanermullu aarlerinaatit kiisalu isumannaatsuunissaaq peqqinnissarlugu pillugit iliuusissatut aalajangersagaasut.

§ 47. Inuusuttut 18-it inorlugit ukiullit piffissaq suliffissaat inersimasunut, suliani taakkuusuni sulisorineqartunut, piffissamit suliffissaatitaasumiit sivilunerussanngilaq, aamma ullormut nal. akunneri arfineqpingasut sapaatillu akunneranut nal. akunneri 40-t sinnissanagit.

Imm. 2. Inuusuttut 15-it inorlugit ukiullit imaluunniit atuartussaannermt pineqartunut ilaasut ullormut piffissaq suliffissaat ulluni atuarfusuni nal. akunnerinit marlunnit ullunilu allani atuarfun-ngitsuni nal. akunnerinit arfineqmarlunnit sivilunerussanngilaq. Taamaattorli inuusuttut 15-ileereersimasut sulili atuartussaannermt pineqartunut ilaasut, ulluni atuarfunngitsuni ullormut nal. akunnerini arfineqpingasuni sulisinnaapput. Sapaatit akunneranut piffissaq suliffissaq tamarmiuseq sapaatit akunnerini atuarfusussani nal. akunnerinit 12-init sapaatillu akunnerini allani atuarfusussaannngitsuni nal. akunnerinit 35-nit

sivisunerussanngilaq. Taamaattorli inuusuttut 15-ileereersimasut, sulili atuartussaanermi pineqartunut ilaasut sapaatit akunnerini allani atuarfusussaanngitsuni nal. akunnerini 40-ni sulisinnaapput. Inuusuttut 15-it inorlugit ukiullit atuartussaanermi peqataajun-naarsimasut ullormut piffissaq suliffissaat nal. akunnerinit arfineqmarlunnit sapaatillu akunneranut nal. akunnerinit 35-nit sivisunerussanngilaq. Imm. 3. Ullormut piffissaq suliffissaq nal. akunnerinit 4½-init sivisunerussappat inuusuttut 18-it inorlugit ukiullit sivikinnerpaamik minutsini 30-ni unikkallarfeqartitaassapput. Unikkallarfissap qanoqilineratigut pisarnissaa naleqqussagaassaaq ajornanngippallu ataannartuutitaassaaq. Imm. 4. Inuusuttut 18-it inorlugit ukiullit piffissami nal. 20-p aamma nal. 6-ip akornanniittumi suliaqartitaassanngillat. Imm. 5. Suliffeqarnermut ministeri makku pillugit malittarisassiorsinnaavoq

- 1) inuusuttut ilinniarnep ilaatut imaluunniit arlaliusunik sulisitsisoqarlutik suliaqartillugit piffissap suliffissap aqqissuunnissaa naatsorsornissaalu,
- 2) imm. 1-ip qanoq annertutigisumik saneqqunneqarsinnaanissaa inuusuttunut 15-inik ukioqaleereersimasunut atuartussaanermilu peqataajunnaareersunut tunngatillugu,
- 3) inuusuttut atuartussaanermi pineqartunut ilaasut atuannigfeqarnerup ingerlanerani suliaqartitaanngilluinnarnissaat, aamma
- 4) imm. 4-mi aalajangersakkap sulianut imaluunniit suliatigut susassa qarfinnut tunngatillugu saneqqunneqarsinnaanissaa, pissutsit inuusuttunut 15-ileereersunut atuartussaanermilu peqataajunnaareersunut taamaaliortariaqartitsisillugit imaluunniit taamaaliornissaa kissaatiginartillugu, inuusuttulli piffissami nal. 24-p aamma nal. 4-p akornanniittumi suliaqanngilluinnartussanngorlugit.

§ 48. Inuusuttut 18-it inorlugit ukiullit ullormi unnuamilu ataatsimi sivikinnerpaamik nal. akunnerini 12-ini ataannartumik qasuersaarfissaqartitaassapput. Taamaattorli inuusuttut 15-it inorlugit ukiullit imaluunniit atuartussaasut, ullormi unnuamilu sivikinnerpaamik nal. akunnerini 14-ini qasuersaarfissaqartitaassapput. Imm. 2. Ullut unnuallu arfineqmarluk ingerlanerini inuusuttut 18-it inorlugit ukiullit ullunik unnuanillu ataannartunik marlunnik sulinngiffeqartitaassapput. Ullut unnuallu marluk taakku ataan-nartumik sulinngiffeqarfiutitaasinnaanngippata ulloq unnuarluk sulinngiffeqarfissaaq ataaseq ullor-moortumi qasuersaarfissamut uiggiutigineqassaaq. Ullut unnuallu sulinngiffeqarfissat taakkua arlaat ajornartinnagu sapaammi pisusanngortitaasassaaq. Imm. 3. Sulianut suliatigullu susassa qarfinnut imaluunniit suleriaatsinut immikkut ittunut tunngatillugu pissutsit tamanna pisariaqartissappassuk imaluunniit kissaatiginartippassuk sulif-feqarnermut ministeri makku pillugit malittarisassiorsinnaavoq

- 1) inuusuttut 15-ileereersut atuartussaanermilu peqataajunnaareersut taarsiutitut qasuersaarfissinneqassatillugit piffissap qasuersaarfissap sivisussusissaa,
- 2) inuusuttut 15-ileereersut atuartussaanermilu peqataajunnaareersut taarsiutitut ullormik unnuamillu sulinngiffeqartitaassatillutik ullormik unnuamillu sulinngiffeqarfissamik kinguartitsigallarnek,
- 3) piffissamik qasuersaarfusumik kipititsigallarnek aamma
- 4) ullormik unnuamillu sulinngiffeqarfissamik sivikillilineq, taamaattorli inuusuttoq pineqartoq tamatigut ullut unnuallu ingerlanerini tamani immikkut sivikinnerpaamik nal. akunnerinik 36-nik ataannartunik sulinngiffeqartussanngorlugi.

§ 48 a. Suliffeqarnermut ministeri aamma malittarisassiorsinnaavoq inuusuttunut 15-inik ukioqaleereersunut atuartussaanermilu peqataajunnaareersunut tunngatillugu § 42-mi taaneqartutut

pisuni § 47, imm. 1-imik, 3-mik aamma 4-mik saneqqutsisinnaanissaq pillugu.

Kapitali 10

Nakorsanit misissorneqartarnerit il. il.

§ 49. Sulliviit, suliat, suliatigut susassa qarfiit imaluunniit sulisut ataatsimoortut, peqqinnissakkut aarlerinaatilinnik suliallit, pillugit suliffeqarnermut ministeri Kalaallit Nunaanni Namminersorlutik Oqartussat suleqatigalugit makku pillugit malittarisassiorsinnaavoq,

1) sulisussat atorfinitsinneqalersinnatik, sulisorineqarnerminni aamma sulisorineqarunnaarnikkut, nakorsani misissorneqartarnissaat, immaqalu akuttunngitsunik misissortittarnissaat, aamma

2) akuttunngitsunik imaluunniit pisuni ataasiakkaani suliatigut, sulianik peqqissaarussinissakkut imaluunniit allatigut peqqinnissaq pillugu nakorsanik misissuisoqartassasoq.

Imm. 2. Suliffeqarnermut ministeri malittarisassiorsinnaavoq suliap peqqinnissamut aarlerinartorsiortitsisinnaanera naliliiffiginarlugu taamatulli misissuisoqartarnissaa pillugu.

Imm. 3. Misissuineri aningaasartuutit sulisitsisumit imaluunniit naalagaaffimmit akilernerqartassapput malittarisassat suliffeqarnermut ministerimit aalajangersarneqartussat malillugit.

Imm. 4. Sulisitsisup isumagissavaa misissuinerit sulisorisanut akissarsiassatigut annaasaqaataanngitsumik ajornanngippallu piffissami suliffiusumi pisarnissaat.

Imm. 5. Suliffeqarnermut ministeri malittarisassiorsinnaavoq sulisuusut sulisorisimasallu misissortinnissamut pisussaanerat pillugu.

§ 49 a. Suliffeqarnermut ministeri immikkut ittunik malittarisassiorsinnaavoq inuusuttut 18-it inorlugit ukiullit sulisitsisumi sulilernissartik siunertaralugu nakorsanit misissorneqartarnissaat pillugu. § 49, imm. 3-5, taamatulli atortuutinneqassapput.

Imm. 2. Malittarisassani aalajangersarneqarsinnaavoq atuartoq atuarfimmii anilersinnagu atuarfiup nakorsaa misissuisimanini tunngavigalugu nalunaaruteqartassasoq atuartoq pineqartoq nappaateqarnerseq imaluunniit nappaateqarsimanerseq atuatumut inuussutissarsiorluni sulinerani isumannaatsuunissaanut peqqinnissaanullu sunniuteqarsinnaasumik. Malittarisassat taakkua assingi aalajangersarneqarsinnaapput inuusuttunut 18-it inorlugit ukiulinnut suliatigut ilinniagaqartunut tunnga-tillugu.

Imm. 3. Malittarisassani aammattaaq aalajangersarneqarsinnaavoq sulisitsisut inuusuttunik 18-iliisimannngitsunik atorfinitsitsinerminni qularnaartassagaat suliat inuusuttumut suliaritinniakkat peqqissutsimigut atugaanut naleqquttuusinnaassanersut.

Kapitali 11

Suliffigissaasut il. il.

§ 50. Kalaallit Nunaanni suliffigissaasunik pilersitsisoqassaaq, suliffeqartitsinermi peqataasut sulinermi isumannaatsunik peqqinnartunillu avatangiiseqarnissamut suliniutinut oqaasissaqaqataat-innissaannik siunertaqartunik. Suliffigissaasut makkuninnga suliaqassapput:

1) Suliffigissaasut peqataaffigissavaat sulinermi avatangiisit pillugit ajornartorsiutinut ilisimasaqarnerulersitsinissaq.

- 2) Suliffigissaasut namminneq suliniuteqarnermikkut oqaluuserisassavaat apeqqutit sulinermi avatangiisinut pingaaruteqarsorisatik tamakkulu pillugit suliffeqarnermut ministerimut, Naalakkersuisunut Sullivinnillu Nakkutilliisoqarfimmut oqaaseqaateqartassapput.
- 3) Suliffigissaasut inatsimmut allannguutissat malittarisassallu nutaat oqaaseqaateqarfigalugillu allannguutissanik siunnersuuteqartassapput aammalu suliasat ataasiakkaat pillugit suliffeqarnermut ministerimit, Naalakkersuisunit imaluunniit Sullivinnik Nakkutilliisoqarfimmit saqqummiunneqartut pillugit.

§ 64 malillugu naammagittaalliutit aalajangiiffigineqalersinnagit siunnersuisoqatigiit oqaaseqaateqartinneqartassapput.

Imm. 2. Suliffigissaasut suleqatigiissitaliorsinnaapput aamma taakkunani ilaasortassanik toqqaasinnaapput, aamma namminneq ilaasortarisamik avataanniittunik.

Imm. 3. Suliffigissaasut sulinerminni atugassatut immikkut paasisimasalinnut nalunaaruteqartit-siniaasinnaapput aamma misissuisitsilersinnaallutik.

Imm. 4. Suliffeqarnermut ministerip suliffigissaasut suleriaasissaat akuersissutigissavaa.

§ 51. Suliffigissaasut inuttarissavaat siulittaasoq naalakkersuisuniit suliffeqartitsineri peqataasut oqaaseqaateqartereerlugit toqqagaq ilaasortallu allat makkuusut:

- 1) Ilaasortat marluk Sulinermik Inuussutissarsiuteqartut Kattuffiannit (SIK) toqqakkat.
- 2) Ilaasortaq ataaseq Nunatsinni Perorsaasut Kattuffiannit (NPK), Peqqissaasut Kattuffiannit (PK) aamma Kalaallit Nunaanni ilinniartitsisut kattuffiannit (IMAK) peqatigiinnikkut toqqagaq.
- 3) Ilaasortaq ataaseq Atorfillit Kattuffiannit (AK) aamma Kalaallit Nunaanni ilinniagaqqortut kattuffiannit (ASG) peqatigiinnikkut toqqagaq.
- 4) Ilaasortaq ataaseq Kalaallit Nunaanni Sulisunik Siulersuisut Kattuffiannit (SSK) toqqagaq.
- 5) Ilaasortaq ataaseq Kalaallit Nunaanni sulisitsisut peqatigiiffiannit (GA) toqqagaq.
- 6) Ilaasortaq ataaseq Kalaallit Nunaanni Kommuneqarfiit Kattuffiannit (KANUKOKA) toqqagaq.
- 7) Ilaasortaq ataaseq Kalaallit Nunaanni Naalakkersuisunit Aningaasanut Ministereqarfik isumasioqatigalugu toqqagaq.

Imm. 2. Kattuffiit sinniisuutitaminnut tamanut immikkut sinniisussamik toqqaassapput.

Imm. 3. Siulittaasoq ilaasortallu allat taakkualu sinniisussaak ukiut sisamakkaarlugit toqqarneqartassapput toqqagaaqqittoqarsinnaassaarluk.

Imm. 4. Suliffigissaasuni aalajangiinerit ilaasortat najuuttut akornanni taasinerit amerlanerussuteqarnerisigut aalajangiinerussapput. Taasinerit amerlaqatigiikkaangata siulittaasup taasinerit aalajangiisuusassaaq.

Imm. 5. Teknikikkut nakorsaqaarnikkullu immikkut paasisimasallit siunnersuisoqatigiinni pisariaqartitsineq malillugu taaseqaataasinnatit ataatsimeeqataasassapput.

Imm. 6. Sullivinnik Nakkutilliisoqarfik suliffigissaasut ataatsimiinnerini sinniisuutitamik ataatsimik taasisinnaatitaanngitsumik peqataatitaqartassaaq aammalumi suliffigissaasunut allatseqarfiussaaq.

§ 52. (Atorunnaarsinneqarpoq).

§ 53. Suliffeqarnermut ministeri Kalaallit Nunaanni sulinermi avatangiisit pillugit qaammarsaanermut ilinniartitaanermullu tapersiissuteqarsinnaavoq.

Imm. 2. Suliffeqarnermut ministeri tapersiissutinik aqutsinissaq pillugu malittarisassiorsinnaavoq.

Kapitali 12

Sullivinnik Nakkutilliisoqarfik

§ 54. Suliffeqarnermut ministeri Kalaallit Nunaanni sulinermi avatangiisinut tunngassutillit pillugit allaffissornikkut qullersaasutut oqartussaataaassaaq.

Imm. 2. Sullivinnik Nakkutilliisoqarfiup pisortaata Kalaallit Nunaanni immikkoortortaqaqfissat amerlassusissaat aamma suliaassat immikkoortortaqaqfinnut agguataarneqarnissaat aalajangiiffigissavaa.

§ 55. Sullivinnik Nakkutilliisoqarfik Kalaallit Nunaanni sulinermi avatangiisinut tunngassutilinni makkuninnga suliaasaqassaaq

- 1) sullivinnut, suliffeqartitsisut kattuffinut innuttaasunullu tamanut sulinermi avatangiisinut tunngassutilinnik ilitersuinissaq,
- 2) suliffeqarnermut ministerimut inatsit naapertorlugu malittarisassanik piareersaanerani ikiuunnissaq,
- 3) suliffeqarnermut ministerimiit piginnaatitsisummut naapertuuttumik peqqussuteqartarnissaq,
- 4) teknikikkut inuttullu atugarisatigut ineriartortitsineq pillugu malinnaaffiginninnissaq sulinermi avatangiisini isumannaatsuunissamik peqqinnissamillu sulinerit pitsaanerulersinnissaat siunertaralugu,
- 5) sulianik ingerlassinissamut, suliaqarfiusussanut, teknikikkut atortussanut il. il. kiisalu atortussiat atortullu pillugit pilersaarusanik isummerfigisassatut suliarinninneq aamma inatsit imaluunniit allaffissornikkut malittarisassiat naapertorlugit akuersissuteqarnerit aamma
- 6) inatsimmik aamma inatsit tunngavigalugu peqqussutigineqartunik eqqutitsinissamik nakkutiginninneq.

§ 56. Suliffeqarnermut ministerip Sullivinnik Nakkutilliisoqarfiup pisortaa piginnaatissinnaavaa inatsisikkut imminut piginnaatitsissutaasunik ingerlatsinissamut.

§ 57. Suliffeqarnermut ministerip aalajangersinnaavaa Sullivinnik Nakkutilliisoqarfiup suliaasai erseqqinnerusumik taagukkat pisortat oqartussaataannut allamut namminersortutulluunniit suliffeqarfimmut isumagisassanngortitaassasut, aamma Sullivinnik Nakkutilliisoqarfiup nakkutilliisuusussaanerminik qanoq annertutigisumik ingerlatsinissaa.

Imm. 2. Suliffeqarnermut ministeri malittarisassiorsinnaavoq isumannaatsuunissaq peqqinnissarlu pillugit peqqussutaasut malinneqarnerannik misiligaanissat allatulluunniit uppersarsarneqar-nissaasa akuersaarneqartarnissaat pillugu.

Imm. 3. Suliffeqarnermut ministerip aalajangersarsinnaavai misissuinernut il. il. Sullivinnik Nakkutilliisoqarfimmit ingerlanneqartunut imaluunniit aallarneqartunut akiliuteqartarnissaq, soorlu immaqa annertussusilerikkatut akitsuusiuttakkatulli, pillugu malittarisassat.

§ 57 a. Akiliutinut malittarisassat, matumunnga ilanngullugit sullivinni avatangiisit pillugit ilinniartitsinermi Sullivinnik Nakkutilliisoqarfiup aningaasartuutaanik matussutissat ilaannik sulisitsisunut

akileeqqusisarneq akiliisarnerallu pillugit malittarisassanik suliffeqarnermut ministeri aalajangersaasinnaavoq.

Imm. 2. Ukioq pineqartoq pillugu aningaasanut inatsimmi akit aningaasarsiallu tamanut atuuttut qaffattarnerat naapertorlugu akiliut ukiumoortumik naleqqussarneqartassaaq.

§ 57 b. Aatsitassat pillugit ingerlatallu tamatumunnga pingaarutillit pillugit Inatsisartut inatsisaat imaluunniit erngup nukingata innaallagssiornermut atorneqartarnera pillugu Inatsisartut inatsisaat malillugit pisinnaatitaasut, allallu akuersissutaateqartut, akiliummik akiliuteqartarnissaat pillugu maleruagassanik suliassaqtitsinermit ministeri aalajangersaasinnaavoq. Sullifinnik Nakkutilliisoqarfup nakkutilliinermini kiisalu akuersissuteqarfusup iluani ingerlatat pillugit oqartussatut sullissinermini aningaasartuutai akiliutitigut matussuserneqassapput, taamaattoq tak. imm. 3.

Imm. 2. Sullivinnik Nakkutilliisoqarfup nakkutilliinermit atatillugu angalanernut, oqalutsimut, nutserinermit kiisalu nerisanut najugaqarnermullu aningaasartuutaat pisinnaatitaasut allallu, imm. 1-imut ilaasut akilissavaat.

Imm. 3. Misissueqqaarnernut, ilisimatuussutsikkut misissuineranut kiisalu atorluaanissamut pilersaarut Naalakkersuisunit akuerineqartoq tikillugu misissueqqissaarnernut imm. 1 aamma 2 malillugit nakkutilliinermit akiliuteqarnissamut piumasaqaat atuutinngilaq.

Imm.4. Imm. 2 malillugu akiliutininik akileeqqusineq pillugu maleruagassanik suliassaqtitsinermit ministeri aalajangersaasinnaavoq.

§ 58. Suliffeqarnermut ministeri malittarisassiorsinnaavoq sulisilluni ajunaarnerit, toqunartulinnik sunnertinnerit, inuussutissarsiornermi nappaataalersut pissutsillu allat sulinermit avatangiisitigut pingaarutillit nalunaarutaanissaannut pisussaaneq pillugu.

Imm. 2. Kinaluunniit pisortanik sullissinermini imaluunniit suliassarititaasunik ingerlassinermini pissutsinik inatsimmut matumunnga malittarisassanulluunniit inatsit naapertorlugu suliaasunut akерliusunik ilisimannilersoq tamanna pillugu Sullivinnik Nakkutilliisoqarfimmut ilisimatitsissuteqassaaq.

Imm. 3. Nakorsaq inuup suliffimmini ajoqusiisinnaasunit sunnertissimaneranik paasisaqartoq imaluunniit pasitsaassaartoq Sullivinnik Nakkutilliisoqarfimmut kalерriisassaaq. Suliffeqarnermut ministeri tamanna pillugu malittarisassiorsinnaavoq.

§ 58 a . Sulisilluni ajoqusernerit nalunaarutiginerannut nalunaaruteqartarfimmi paasissutissat aamma sulisilluni ajutoornerit inuussutissarsiornermillu nappaatigilikkat pillugit Arbejdsmarkedets Erhvervssikringip paasissutissatigut tunngavii Sullivinnik Nakkutilliisoqarfup pisariaqartillugu katersorsinnaavai ataatsimoortillugillu. Sullivinnik Nakkutilliisoqarfup nakkutilliinerata misissuisarneratalu siunnerfilernissaanut atugassatut suliffeqarfiit kinaassusersinissaannut nakkutilliinissaq nalunaarsukkallu ataatsimoortinnissaat siunertaralugu paasissutissat katersorneqassapput. Aammattaaq nalilersueqqissaarnermut pitsaaliuinernullu siunertanut kiisalu naatsorsueqqissaarnermik siunertanut suliarinninnermut nalunaarsukkallu ataatsimoortinnerannut paasissutissat katersorneqassapput.

§ 59. Kikkulluunniit inatsit malillugu pisussaaffiligaasut qinnuigineqarnikkut Sullivinnik Nakkutilliisoqarfimmut paasissutissanik tamanik, nakkutilliisoqarfup sulinermini pisariaqartitaanik,

paasissutissiisassapput.

Imm. 2. Sullivinnik Nakkutilliisoqarfiup sulisui eqqartuussiviit aalajangiingikkaluit kiussutsimut uppersaammik eqqortumik takutitsinikkut pisortat namminersortullu suliffeqarfinut sukkulluunniit isersinnaatitaassapput, taamaattoq tak. imm. 3, imminnut suliassarititaasut isumagisinnaajumallugit pisariaqartitsineq naapertorlugu. Pisariaqassappat politiit tamatumunnga ikiuuttassapput.

Ikiorserneqarnissaq pillugu malittarisassat erseqqinnerusut suliffeqarnermut ministerimit inatsisinik atortitsinnermut ministeri isumaqatiginiareerlugu aalajangersarneqarsinnaapput.

Imm. 3. Imm. 2 atortuutinneqassanngilaq Sullivinnik Nakkutilliisoqarfiup inuussutissarsiuutiginaq sulianik, inummit allap illuani namminerluunniit illumini, sunngiffimmi najortagaani, qamutaani, nuannaariartaatitut angallataani imaluunniit illumi inoqutigiit pigisaannik allanik suliaqarnermi ingerlanneqartunik nakkutiginninneranut. Suliffeqarnermulli ministerip aalajangersinnaavaa, Sullivinnik Nakkutilliisoqarfik elevatorinik allanillu kivittaatitut atortunik aamma silaannaap naqitsinertalittut atortunik inatsisit aalajangiingikkaluit misissuisarnernik nakkutiginninnermillu ingerlatsiinnassasoq.

Imm. 4. Sullivinnik Nakkutilliisoqarfimmi sulisuusut nakkutilliinermi ingerlataqarnerup ilaatut eqqartuussiviit aalajangiingikkaluit uppersaatinik pineqarsinnaasunik tunniusseqqusisinnaapput, tamatumani aamma assiliivimmik assiliisinnaallutik assigisaattullu iliorsinnaallutik, aamma misiligitissanik erseqqinnerusumik misissoqqissaagassanik tiguisarsinnaallutik. Sulisitsisoq taassumaluunniit sinniisaa tamatuminnga ilisimatinneqartassaaq, tak. § 17 b aamma § 18.

§ 60. Sullivinnik Nakkutilliisoqarfiup peqqussutigisinnaavaa pissutsit inatsimmut malittarisassanulluunniit imaluunniit inatsit naapertorlugu aalajangiinnermut akerliusut ingerlaannaq imaluunniit piffissaliussaq naatinngalu iluarsineqassasut.

Imm. 2. Sullivinnik Nakkutilliisoqarfiup pisariaqarsoriguniuk sulisunut allanulluunniit isumannaallisaanikkut peqqinnissakkulluunniit aarlerinartorsiorfitsinerup, annertuumik ajoqusiisinaanerup pinngitsoortinniarnissaa, peqqussutigisinnaavaa tamatuma aaqqiiviginiapallanneqarnissaa ilanngullugu

1) najuuttut aarlerinartorsiorfusumiit qimagutipallannissaat,

2) maskiinamik, maskiinaq pisataanik, immiussivimmik, sanaamik ineriikkamik, apparatimik, sakkumik allatulluunniit teknikikkut atortumik imaluunniit atortussiamik atortumilluunniit atuinerup unitsinneqarnissaa, imaluunniit

3) sulinerup aamma unitsinneqarnissaa.

Imm. 3. Sullivinnik Nakkutilliisoqarfiup pisortaata peqqussutigisinnaavaa, kinaluunniit teknikikkut atortumik, imminnut illersuutissiamik imaluunniit atortussiamik atortumilluunniit, atorfissaanut naapertuuttumik atornerqaraluarluni isumannaallisaanermut peqqinnissamulluunniit aarlerinartorsiorfitsisutut paasineqartumik, tunniussuisuusimasoq imaluunniit nioqquteqartuusimasoq aarlerinaatit pitsaaliorniarlugit pisariaqarneratut iliuuseqassasoq. Tamatumani peqqussutigineqarsinnaavoq

1) tunniussuinerup nioqquteqarnerullu unitsinneqarnissaat, aamma

2) teknikikkut atortut, imminut illersuutissiat imaluunniit atortussiat atortulluunniit nioqquteqarfusumiit uterteqquneqarnissaat.

§ 61. Suliffeqarnermut ministeri malittarisassiorsinnaavoq suliffiusumi nakkutilliinermut allattaaveqassasoq imaluunniit allatut tamatumunnga naapertuuttumik nakkutilliisoqarfiup pissutsit

sulinermi avatangiisinut tunngassutillit pillugit misissuiartorsimanerinit, peqqussutaanut allatigullu nalunaarutaanut uppersaatissaqarnissaa pillugu aamma nakkutilliinermut allattaavinnik upper-narsaasiussanilluunniit atuinissaq toqqortarinnittarnerlu pillugit.

Imm. 2. Sulisitsisup allaganngorlugit peqqussutaasut il. il. pillugit Sullivinnit Nakkutilliisoqarfiup piffissaliussaa naatinnagu akissuteqartarnissamik piumasaqaatit malitassarai.

§ 62. Pisortat inuillu kapitalit 10-12 malillugit suliassanik ingerlataqartussat, kiisalu kikkulluunniit tamatumunnga ikiuuttussat isertuussisussaapput pinerluttulerinermik Kalaallit Nunaannut inatsimmi § 29 malillugu.

Imm. 2. Sullivinnik Nakkutilliisoqarfimmi suleqataasooq naammagittaalliuut naapertorlugu nakkutilliisoqarfiup misissuiartornissaanik sulisitsisumut taassumaluunniit sinniisuanut paasissutissiisanngilaq.

§ 63. Naalakkersuisut imaluunniit ministerip susassaqartup isumaqatiginiareernerisigut suliffeqarnermut ministeri malittarisassiorsinnaavoq Sullivinnik Nakkutilliisuutit pisortat oqartussaataannik allanik suleqatiginninnissaat pillugu.

Kapitali 13

Naammagittaalliorsinnaaneq

§ 64. Sullivinnik Nakkutilliisoqarfiup aalajangiineri aalajangiinerup pineqartumut nalunaarutaareerneraniit sapaatit akunneri arfinillit qaangiutsinnagit suliffeqarnermut ministerimut naammagittaalliuutaasinnaapput.

Imm. 2. Naammagittaalliuut Sullivinnik Nakkutilliisoqarfimmut nassiunneqartassaaq. Sullivinnik Nakkutilliisoqarfiup aalajangiinini aalajangiusimaannarpagu, naammagittaalliuut suliffeqarnermut ministerimut ingerlateqqinneqartassaaq.

Imm. 3. Naammagittaalliuut piffissaq eqqorlugu tiguneqartoq kinguartitsigallarnermik sunniuteqartassaaq suliffeqarnermut ministerip aalajangiinissaa tikillugu imaluunniit suliffeqarnermut ministerip allatut aalajangiinissaanut. § 60, imm. 1, malillugu pissutsinik aaqqiiviginiapallagassanik aamma § 60, imm. 2 aamma 3 malillugit aalajangiinernik naammagittaalliuutit kinguartitsigallarnermik sunniuteqartussaannngillat.

Imm. 4. Immikkut ittunik pissutissaqartillugu naammagittaalliuut suliffeqarnermut ministerip suliarisinnaavaa aamma kinguartitsigallarnissamik sunniuteqarnissaa aalajangersinnaallugu, naammagittaalliuut piffissaq eqqorlugu tiguneqanngikkaluaq.

Imm. 5. Suliffeqarnermut ministeri naammagittaalliummik aalajangiiffiginilersinnagu Suliffigissaasut oqaaseqaateqartinneqartassapput.

Kapitali 14

Pinerluttulerinermi inatsisit malillugit pineqaatissiisutissat

§ 65. Pinerluttulerinermik Kalaallit Nunaannut inatsit malillugu pineqaatissinneqassaaq,

1) § 11-mik, § 11 a, imm. 1-3-mik, § 12-imik, § 13, imm. 1-imik aamma 2-mik, §§ 14-17-imik, §§ 19-28-mik, § 31, imm. 1-imik 2-millu, § 32, imm. 1-imik, § 34, imm. 1-imik, § 36, imm. 1-imik, § 38, imm. 1-imik, § 58, imm. 2-mik aamma 3-mik, § 59, imm. 1-imik, aamma § 61, imm. 2-mik unioqutitsisoq,

2) sulianik kapitali 8-mut aamma 9-mut akerliusumik ingerlataqartitsisoq, sulianik taama ittunik siulersuisoq imaluunniit nakkutiginnittuusoq imaluunniit sulianik kapitali 8-mut akerliusumik ingerlataqartoq,

3) § 60 malillugu peqqussutaasunik malinninngitsoq, imaluunniit

4) § 17 a, imm. 2, malillugu paasissutissiumanngitsoq.

Imm. 2. Imm. 1 malillugu pinerluttulerinermi inatsisitigut pineqaatissiissutip aalajangiivigineqarnerani pissutsitut immikkorluinnaq sukannernerulersitsissutaasutut isigineqassaaq, unioqutitsineq perlasinermik kinguneqarsimappat inuup ajoquserujussuarneranik imaluunniit toquneranik nassataqartumik.

Imm. 3. Imm. 1 malillugu pinerluttulerinermi inatsisitigut pineqaatissiissutip aalajangiivigineqarnerani, sulisitsisoq inatsisip kapitalia 3 malillugu pisussaaffimminik naammassinnissimatillugu, pissutsitut immikkorluinnaq sukannernerulersitsissutaasutut isigineqassaaq sulisoq piaaraluni imaluunniit mianersuaalliorujussuarluni inatsisit piunasaqaataannik makkuninnga unioqutitsippat

1) illersuutininik inummut atugassianik atuisussaaneq,

2) milluaasuliissutinik atuisussaaneq,

3) atortunik illersuutaasunik isumanaallisaataasunillu atuisussaaneq imaluunniit

4) suleriaatsinik illersorneqarsinnaasunik atuisussaaneq.

Imm. 4. Imm 3-mi taaneqartut saniatigut pisoqartillugu imm. 1 aamma 2 malillugit pinerluttulerinermi inatsisitigut pineqaatissiissutip aalajangiivigineqarnerani pissutsitut sukannernerulersitsissutaasutut isigineqassaaq,

1) unioqutitsineq piaaraluni imaluunniit mianersuaalliorujussuarnikkut unioqutitsineruppat,

2) unioqutitsinermi inuup inuunera peqqissusaalluunniit ajoquserneqarsimappat imaluunniit taamatut ajoquserneqarnissaa navialisinneqarsimappat, pisoq imm. 2-mut ilaanngikkaluartoq,

3) § 60, imm.1 imaluunniit 2 naapertorlugu pisoq taannarpiaq imaluunniit tamatumunnga assingusoq pillugu siornatigut peqqussuteqartoqareersimappat, imaluunniit

4) unioqutitsinermi pineqartoq nammineq allalluunniit aningaasatigut iluanaaruteqarsimappata imaluunniit iluanaaruteqarnissaat siunertarineqarsimappat.

Imm. 5. Immikkut ittumik sukannernerulersitsissutaasutut isigineqassaaq inuusuttut 18-it inorlugit ukiullit inuunerat peqqissusaalluunniit ajoquserneqarpat imaluunniit ajoquserneqarnissaa navialisinneqarsimappat, tak. imm. 4, nr. 2.

Imm. 6. Iluanaarutit unioqutitsinikkut pissarsiaasut arsaarinnissutaassanngippata akiliisitsissutinik, ilanngullugit tapiliussatut akiliisitsissutit, annertussusiliinermi aningaasatigut iluanaarutit imaluunniit iluanaarutiginiarneqarsimasut annertussusaat immikkut pingaartinneqartassaaq.

Imm. 7. Peqataaneq pillugu Kalaallit Nunaanni pinerluttulerinermi inatsimmi § 13 atuutissaaq pinerluttulerinermi inatsisitigut akisussaatitaanermut imm. 1-imi aamma 2-mi pineqartumut.

Imm. 8. §§ 24-28-mik kiisalu malittarisassanik § 29 malillugu sananeqarsimasunik unioqutitsinermi pinerluttulerinermi inatsisitigut akisussaatitaanerup pisoqalisoornissaanut piffissarititaq ukiunik tallimanik sivilissuseqarpoq.

§ 66. § 11-mik, § 11 a, imm. 1-3-mik, § 12-imik, § 32, imm. 1-imik, § 34, imm. 1-imik, § 36, imm. 1-imik, aamma § 38, imm. 1-imik kiisalu pissutsinik § 65, imm. 1, nr. 2-mi aamma 3-mi pineqartunik unioqqutitsisoqartillugu sulisitsisusoq akiliisitsissutissanut akisussaatitaasinnaavoq, unioqqutitsineq taassuma piaaraluneerneratut mianersuaalliorneratulluunniit, taamaattorli takuuk imm. 3 naatsorsuunneqarsinnaanngikkaluartoq. Akiliisitsissutissanut akisussaaffiginninnissami patsisissaassaaq unioqqutitsinerup inunnut sullivimmut attuumassutilinnut ataatsimut arlalinnulluunniit imaluunniimmi sullivimmut taamaattutut tutsinneqarsinnaanera. Aalajangersagaq taanna malillugu akiliisitsissutissanut tunngatillugu pinerluttulerinermik Kalaallit Nunaannut inatsimmi § 91, imm. 4, atortuutinneqassanngilaq. Imm. 2. Akiliisitsissutissat annertussusilernissaanni § 65, imm. 2, 4 aamma 5. aamma imm. 3, taamatulli atortuutinneqartassapput.

Imm. 3. Sulisitsisoq inatsisip kapitalia 3 naapertorlugu pisussaaffimminik naammassinnissimatillugu sulisitsisoq pinerluttulerinermi inatsit tungavigalugu pineqaatissinneqarsinnaanngilaq, sulisut inatsisitigut piumasaqaatinik makkuninnga unioqqutitsisimappata

- 1) illersuutininik inummut atugassianik atuisussaaneq,
- 2) milluaasuliissutininik atuisussaaneq,
- 3) atortunik illersuutaasunik imaluunniit isumannaallisaataasunik atuisussaaneq imaluunniit
- 4) suleriaatsinik illersorneqarsinnaasunik atuisussaaneq.

§ 67. Peqqussusiani, inatsit naapertorlugu suliaasussani, aalajangersaasoqarsinnaavoq peqqussusianik aamma peqqussiat naapertorlugit peqqussutaasunik unioqqutitsinernut pinerluttulerinermik Kalaallit Nunaannut inatsit malillugu pineqaatissiissutissat pillugit. Aammattaaq aalajangersarneqarsinnaavoq sulisitsisusoq akisussaatitaassasoq peqqussusianik, peqqussutaasunik inerteqqutinilluunniit taaneqartutut unioqqutitsinermut, naak pineqartoq taanna piaaraluneerluni mianersuaalliorluniluunniit unioqqutitsisutut naatsorsuunneqarsinnaanngikkaluaq. Akiliisitsinissamut patsisissaassaaq unioqqutitsinerup inunnut sullivimmut attuumassutilinnut ataatsimut arlalinnulluunniit sullivimmulluunniit taamaattutut pisuutitsiniutaasinnaanissaa. Aalajangersagaq taanna malillugu akiliisitsissutissanut tunngatillugu pinerluttulerinermik Kalaallit Nunaannut inatsimmi § 91, imm. 4, atortuutinneqassanngilaq.

§ 67 a. Pinerluttulerinermik Kalaallit Nunaannut inatsimmi § 66, imm. 1-imi oqaaseqatigiit siulliit, aamma § 67-imi oqaaseqatigiit aappaat malillugit pineqaatissinneqarsinnaanngillat sullivimmik siulersuisuusut allalu, tak. § 17 b.

§ 68. Ingerlatsiviit il.il. (inuit inatsisitigut pisinnaatitaasut pisussaataitaasullu) pinerluttulerinermi inatsimmi kapitali 5-imi malittarisassat naapertorlugit pinerluttulerinermi inatsisitigut akisussaatinneqarsinnaapput. § 66, imm. 3 taamatulli atortuutinneqassaaq.

§ 69. Inuusuttut 18-it inorlugit ukiullit inatsimmi matumani aalajangersakkanut imaluunniit inatsit naapertorlugu peqqussusianut akkerliisut sulisorineqartillugit angajoqqaatut oqartussaassusillit akiliisussanngortitaasinnaapput taakkua nalunngeriigaannik sulisorineqarsimassappata.

§ 69 a. Eqqartuussutini, tamatumuuna arlaannik inatsit manna malillugu pisussaaffimmik naammassiniagassiisoqarsimatillugu, pinngitsaaliissutitut ingerlaartussanik akiliisitsinissaq, naalagaaffiup karsiata pisassaanik, aalajangerneqarsinnaavoq.

§ 70. Eqqartuussisutigoortitassat Kalaallit Nunaata Eqqartuussivianit siullermeersumik suliarinniffusutut suliarineqartassapput.

Kapitali 15

Atortuulersitsissutitut ikaarsaariarnermilu aalajangersakkat

§ 71. Inatsit atuutilissaaq ulloq 1. juli 1986.

§ 72. Kalaallit Nunaanni sulisartut illersorneqarnissaannik inatsit nr. 225, 19. maj 1971-imeersaq atorunnaassaaq.

Imm. 2. Malittarisassiat makku, inatsit imm. 1-imi taaneqartoq tunngavigalugu aalajangersarneqartut atuutiinnassapput inatsit manna naapertorlugu allannguutit ilanngullugit, atorunnaarsinneqarnissartik imaluunniit inatsit manna naapertorlugu aalajangersakkanik taarserneqarnissartik tikillugu:

1) Igaasarsuit aalaliortut nunamiittut pillugit Kalaallit Nunaannut nalunaarut nr. 148, 18. april 1972-imeersaq.

2) Silaannaat naqigussat, kuseriarnertut ilusillit imaluunniit naqitsinikkut aatsitat puui angallanneqarsinnaasut pillugit Kalaallit Nunaannut nalunaarut nr. 149, 18. april 1972-imeersaq.

3) Kranit, taaliat assigisaasalu mekanikimit ingerlasut ivertiternissaat atornissaallu pillugu Kalaallit Nunaannut nalunaarut nr. 151, 18. april 1972-imeersaq.

4) Inuusuttut sulinerat navianartoq pillugu Kalaallit Nunaannut nalunaarut nr. 152, 18. april 1972-imeersaq.

5) Naqitsinermik imallit il. il. nunamiittut pillugit Kalaallit Nunaannut nalunaarut nr. 155, 18. april 1972-imeersaq.

6) Kalaallit Nunaanni politiit arbejdstilsynillu suleqatigiinnissaat pillugu Arbejdsministeriap kaajallaasitaa nr. 181, 27. august 1974-imeersaq. Imm. 3. Aalajangersakkanik imm. 2 malillugu atuutiinnartussanik unioqqutitsineq akiliisitsissutaasinnaavoq. §§ 66 aamma 68-70 taamatulli atortuutinneqassapput.

Inatsit nr. 193, 26. marts 1991 § 4-mi imaattunik aalajangersagartaqarpoq:

§ 4

Inatsit atuutilissaaq ulloq 1. april 1991.

Inatsit nr. 321, 18. maj 2005-imeersaq § 2-mi imaattunik aalajangersagartaqarpoq:

§ 2

Imm. 1. Inatsit atuutilissaaq ulloq 1. januar 2006, taamaattoq tak. imm. 2-4.

Imm. 2. § 11 a atuutilissaaq ulloq 1. januar 2008 sulisitsisunut, isumannaatsuunissamik peqqinnissamillu sulinermik aaqqissuussiviginnittussanut. Sulisitsisunut allanut tunngatillugu suliffeqarnermut ministeri Kalaallit Nunaanni Namminersornerullutik Oqartussanik tusarniaavigin-nereernikkut aalajangersaasinnaavoq aalajangersagaq ullormit sumiit atuutilissasoq.

Imm. 3. § 46, imm. 7-mi aalajangersagaq sulinermi pissutsinut, inatsisip atortuulersinneqareerneratigut atuutilersussanut sunniuteqassaaq.

Imm. 4. Inatsit manna naapertorlugu aalajangiinernik naammagittaalliuutinut ulloq 1. januar 2006 suliarineqartunut tunngatillugu makku atuutissapput:

1) Suliassani, Sullivinnik Nakkutilliisoqarfiup pisortaanut naammagittaalliuutaasimasuni, Sullivinnik Nakkutilliisoqarfik aalajangiiffiginnissaaq. Sullivinnik Nakkutilliisoqarfiup aalajangiinera suliffeqarnermut ministerimut naammagittaalliuutaasinnavaq, tak. § 64.

2) Kalaallit Nunaanni Suliffigissaasut aalajangiiniarnissani, suliffeqarnermut ministerimit inatsisip atortuulersinneqareerneratigut aalajangiiffigineqartussani, tusarniaavigineqartassapput, tak. § 64.

Inatsit nr. 1382, 23. december 2012-imeersoq § 2-mi imaattunik aalajangersagartaqarpoq:

§ 2

Imm. 1. Inatsit atortuulissaaq ulloq 1. januar 2013.

Imm. 2. § 1, nr. 10-14 atortuutinneqassaaq inatsisip atortuulersinneqarnerata kingorna unioqqutitsinernut.

Inatsit nr. 461, 15. maj 2017-imeersoq § 3-mi imaattunik aalajangersagartaqarpoq:

§ 3

Inatsit atortuulissaaq ulloq 1. juli 2017.

Suliffeqarnermut Ministereqarfik, ulloq 26. oktober 2005

CLAUS HJORT FREDERIKSEN

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut